

## PLEDARIGROND.CH

# INA TRAGICUMEDIA EN TRAIS ACTS CUN HAPPY END

da Martin Cantieni



L'emprim act ha entschet la stad da l'onn 2005 insanua en ina tegia d'alp. La partiziun d'informatica da la GiuRu ha fatg in experiment che n'aveva betg main brisanza per la Rumantschia che la stgaffiziun da la nursa clonada Dolly (da lez temp) per l'entira umanità: Quests kindels impertinents han simplamain copià il cuntegn dal disc cumpact dal Pledari Grond en l'internet.

Igl è gea uschia che la Lia Rumantscha vuleva gia adina vender il linguatg artificial er a la uschènumnada basa rumantscha, aber halt vender e betg regalar! E lasuenter èn lura era las reacziuns da la Lia Rumantscha stadas, cura ch'ils giuvens rumantschs han preschentà plain luschezza il prototip dal Pledari Grond online (sa chapescha anc protegi cun in pled-clav): La Lia Rumantscha ha smanatschà cun pass giuridics sche la versiun online na svaneschia betg entaifer 24 uras, pertge la GiuRu possedia nagins dretgs d'autur. La Rumantschia mora, l'acceptanza dal rumantsch grischun è miserabla, ma, i na sa gea betg esser che simplamain insatgi vegnia qua e maldovria noss dretgs d'autur dal pledari, u?

Entaifer il segund act - e quai stat en cuntradiziun cun la dramaturgia da trais acts - èsi reussì da calmar las emoziuns senza chappellinas blauas. E tenor il bun exempel da l'economia privata han ins tratg a niz sinergias

ed è sa miss ensemen - sco partenaris equals, fixads entras in contract. Cun quest pass ha ina outra furma da cumbat entschet: „Jau propon da posiziunar il logo trais pixels plinenvi u quatter plinengiu, ed il logo da la Lia n'è betg adattà per star en alv sin fund blau...“ – „La suprastanza da la GiuRu ha decidì ch'ella prefereschia dentant la rama blava sura e sut...“

Er questa fasa da produzioni ha pudì vegnir terminada entaifer ils termins previs dal concept elavurà, ed il terz act è vegnì introduci. Plaun, fitg plaun, ma tuttina cun il ritmus dal temp che enconuscha nagin perdun, suenter 200 uras da lavur da l'informaticher giururist, è la data historica dals 22 da matg 2006 arrivada. En conturn dad auta muntada simbolica – l'event ha gi lieu amez l'areal da la HIGA – è vegnì preschentà dal bab patriarc e da la mamma in pau sfinida en plaina armonia in pop grond: il pledari da l'internet.

Ed jau sai uss pertgè ch'i dat anc nagin institut per la perscrutaziun da linguatgs a Cuira: Perquai che gia in pledari online è ina chaussa fitg, fitg complexa ed i vala da risguardar fitg, fitg, fitg, blier.